

L'Europeada rōia tla Ciarencia

Sëgn el definitiv: l'Europeada dl 2020 gnará ospitada dai slovens dla Ciarencia. La dezijiun é tomada pro le congres dla FUEN a Cluj, tla Romania

Mendranzes - I recorci dl'Europeada 2016 te Südtirol é ciamó frësc y al pè che al sides sté inier che les mendranzes de dōta l'Europa é rovades adalerch tla Val Badia y tla Val de Puster. Tan bel che al é sté da ti lascé odèi olache les mendranzes ladina y todëscia de Südtirol vir y sambëgn ince se confronté sön le ciamp dl palé.

Tan deplü pón se conforté ala proscima Europeada, che gnará tignida tl 2020. Le congres 2017 dla FUEN a Cluj tla Romania é insciö ince stada l'ocajun por lité danter les dōes candidatōres che é gnüdes presentades por organisé adöm ala FUEN l'Europeada 2020: i slovens dla

Ciarencia y les mendranzes dl confin danesc - todësch. La dezijiun n'é por tröc delegac dles mendranzes sigü nia stada saurida, deache al s'á presenté dōes candidatōres stersces y früt de n gran laur da intrames les perts. Mo ala fin el tomé na dezijiun plü che tlera y l'Europeada 2020 gnará tignida tla Ciarencia. "N gran compliment a intrames les delegaziuns por le gran laur y la profesionalité, cun chëra che al é gnü porté inant les candidatōres. Mo dantadöt complimenc ai slovens dla Ciarencia. I ti audun döt le bun por l'organisaziun dl'Europeada 2020", á dit le rapresentant de Südtirol y vizepresident dla FUEN Daniel

Alfreider. "Sciöche i un bele odü dl 2016 te Südtirol, n'é l'Europeada nia ma n momënt de sport, mo tröp deplü. Y te chësc stá süa importanza. Al é le momënt olache les mendranzes de dōta l'Europa rōia adöm, olache an pó imparé da se conëscé y se lascé odèi, se confronté y deboriada chirí soluziuns ai problems de tröpes mendranzes. Ince tla Ciarencia, nüsc vijins, viunse n momënt storich nia sauri por i dërc dles mendranzes. Y la Fuen, cun na litaziun tan tlera, á dit che ara sostëgn y ti stá dlungia ala mendranza tla Ciarencia. Personalmenter pënsi che propi les mendranzes sciöche la nosta, che á tröc dërc y se stá bun, sides cherdades da dé n contribut ales mendranzes manco fortunades", á dit inant Daniel Alfreider. Ince Giorgio Costabiei, organisadü dl'Europeada 2016 por la mendranza ladina, se complimentëia cun i slovens dla Ciarencia: "Ti ultims agn unse cherié na bona colaboraziun y amizizia cun i slovens dla Ciarencia y i sun bele stá ince fora da d'ei. Porchël s'la confortunse ciamó deplü da podèi rapresenté i ladins ala proscima Europeada 2020 tla bela Ciarencia. Y te chësta ocasiun á i ladins indò la poscibilité da rapresenté sü valurs y süa cultura a nivel europeich. Ti proscims 2-3 agn sarál sëgn spo da arjigné ca la delegaziun ladina nōia che tolará pert ala proscima Europeada", stluj jö Giorgio Costabiei.



Amez el Daniel Alfreider y Arno Arthofer (diretur sportif dla Ciarencia) cun i organisadus dl'Europeada 2020.